

DIFERENTE DI ESNAN METI DEN "HOLLAND CONNECTION" TA PERSONANAN CU TABATA CERA CABA PA TRAFICACION DI DROGA

ORANJESTAD(AAN) -- E caso di Holland Connection tabata e topico di discusion durante fin di siman.

Loke por a constata cu ta trata aki di un caso caminda practicamente tur esnan envolvi ta personanan cu den pasado a yega di cay cera pa droga o sea cu ta personanan cu experiencia.

Por deduci esaki tambe for di e hecho Malika Dabhi naci na Moróco pero biba na Hulanda, su tarea específico tabata pa guia e Hulandes Marcel Bouma y e Indones biba na Hulanda Patricia Everts pa tur cos bay bon y pa na Hulanda despista autoridadnan en especial e cacho antidroga door di hunta cocaina na su paña. Door cu e cantidad cu e tabatin den su poder ta 3.5 gram, e lo no bay cera pero Bouma y Everts lo pasa cu e droga.

Durante tratamento di e caso a bin sali na cla cu Dabhi ya a haci un traficacion di 2.5 kilo cual a bay bon y el a haya 20 mil florin.

Zouhair El Juri di Labanon biba na Venezuela ta ser considera como e cerebro tras di e traficacionnan hunto cu e Dominicana Mercedes Sanchez.

Durante tratamento di e caso diferente e Arubiano Mario Genser di La Paloma Restaurant a desmenti cu e tin algo di haber cu e caso pero tanto Sanchez, Dabhi como El Juri a declara cu 2 kilo di e 2.5 kilo cu Dabhi a hiba anteriormente tabata di Mario Genser.

El Juri a declara cu Mario Genser y e Arubiano Roland Petronia a fungi como traductor p'e. Ta asina cu e trailer unda e tabata biba aden ta di Roland Petronia. E Colombiano Luis Chavez Alarcon tabata esun cu a pega e droga na curpa cu Bouma y Everts.

Pa loke ta trata experiencia den traficacion ta asina cu Bouma, Everts, El Juri, Chavez Alarcon y Petronia a yega di haya castigo di prison pa traficacion di droga y awor atrobe nan ta encarcela.

Na redaccion di DIARIO a yega un fax di un persona kende ta remarca pakico den nos edicion di diasabra DIARIO solamente a publica nacionalidad di e Colombiano y no di e otro. E ta

haya cu a duna e impresion cu ta discrimina contra Colombianonan.

DIARIO kier aclarea cu ningun momento esey tabata DIARIO su intension y e motivo cu DIARIO a punta dede riba e Colombiano Chavez

Alcaron ta hustamente pa den e articulo aki referi na dje ya cu e tabata encarcela na Aruba pa traficacion di droga caminda el a haya 8 aña di prison. Normalmente ora encarcela un extranhero en especial pa delitonan serio, nan

ta wordo deporta y ta bay riba e asina yama "black list". Si na 1989 Chavez Alcaron a haya un condena di 8 aña di prison, con por ta posibel cu atrobe e ta meti den traficacion di droga. Esaki ta un in-

dicacion cu mester bin un forma di control mas riguroso aki na Aruba pasobra no por tolera cu extranheronan cu ta comete delitonan contra ley por drenta y sali Aruba manera nan ta haya ta bon.

Castigo condicional y multa pa duo cu a horta 3 television for di hospital

ORANJESTAD(AAN) -- Juez a condena e hombernan G.de Mey y D.Angela na 6 siman condicional di prison y 500 florin di multa of 20 dia den K.I.A. pa a horta tres television y reki for den hospital. E homber G.Dirksz a haya 4 siman di prison condicional y 300 florin di multa of 12 dia den K.I.A. pa a cumpra un television horta for di e duo ariba menciona.

Diabierna Corte di Promer Instancia a trata e caso penal contra G. de Mey, D. Angela y G.Dirksz. Ministerio Publico ta acusa

G.de Mey y D.Angela di na Juli 1996 a horta tres television na hospital.

Ta asina cu Angela tabata traha pa un persona cu tabata instala e televisionnan den hospital pa asina e pacien-tenan tin television di mira. Angela a bisa de Mey unda e televisionnan tabata warda y nan a bay horta tres. Dirksz a cumpra un di e televisionnan pa 100 florin. El a bisa Juez cu el a kere cu ta un ganga el a haya. Angela a bisa Juez cu el a haya un multa pa core auto sin rijbewijs y pesey el a

horta e televisionnan hunto cu de Mey pa asina e haya placa pa paga e multa.

Fiscal a bisa cu e ta haya cu mester manda un señal bon cla cu loke e trio aki a haci no ta aceptabel den comunidad.

El a exige 6 siman di prison condicional cu un tempo di prueba di 2 aña pa de Mey y Angela. Ademas el a exige un multa di 500 florin y si nan no paga esaki nan mester bay sinta 20 dia den K.I.A. Pa Dirksz el a exige 4 siman di prison condicional cu un tempo cu prueba di 2 aña.

Tambe el a exige un multa di 300 florin of 12 dia cera.

Juez mr.drs. Croes a cera tratamento di e caso y a dicta sentencia di biaha. El a bay di acuerdo cu e exigencianan di Fiscal y a confirma esakinan o sea 6 siman di prison condicional pa de Mey y Angela cu un tempo di prueba di 2 aña y un multa di 500 florin y si no paga esaki 20 dia cera. Dirksz a haya 4 siman di prison condicional cu un tempo di prueba di 2 aña y un multa di 300 florin y si e no paga esaki e mester sinta 12 dia.

EVEN OVERSCHAKELLEN!!!

